



Komunikadu imprensa
25 Jullu 2013

Tribunál kondena tinan 16 ba kazu inestu

Iha 22 Jullu 2013 Tribunál Distritál Díli kondena arguidu ne'ebé komete krime violasaun seksuál agravadu hasoru nia oan-hakiak ba tinan 16 iha prizaun. Inestu mak violasaun seksuál ida ne'ebé involve membru familia rasik.

“Violasaun seksuál ba menór hanesan krime ne'ebé sériu tebes tanba aktu ne'e kontra direítu labarik sira nian no iha impaktu todan ba sira. Tuir loloos arguidu hanesan padrastu tenke tau matan ba lezada maibé pelu-kontrariu arguidu mak viola fali ninia oan-hakiak ne'e,” dehan Luis de Oliveira Sampaio, Direitór Ezekutivu JSMP.

Arguidu prátika violasaun seksuál kontra lezada dala rua iha 13 Setembru 2011 no 14 Dezembru 2011 no kauza lezada sai isin rua. Krime ne'e ho natureza violénsia doméstika no inestu tanba arguidu mak vítima nia padrastu rasik no hela hamutuk.

“JSMP preokupa ho krime inestu iha Timor-Leste tanba to'o agora seidak iha artigu spesífiku iha Kódigu Penál kona-ba inestu. Mezmu kazu ne'e hetan sentensa ne'ebé justu, JSMP observa krime inestu akontese dalabarak no difisil atu prova iha prosesu julgamentu.”

“Hanesan JSMP rekomenda ona, tenke iha enkuadramentu legál no protesauun sosiál ne'ebé forte liu atu prevene krime inestu no fó protesauun ba vítima sira ne'ebé vuneravel,” dehan Luis de Oliveira Sampaio, Direitór Ezekutivu JSMP.

Ministériu Públiku akuza arguidu kontra artigu 178 Kódigu Penál kona-ba abuzu seksuál ba menór, maibé tribunál altera tiha ba artigu 172 ho 173 alinea (d) Kódigu Penál kona-ba violasaun seksuál agravadu konjuga ho artigu 35 alinea (b) Lei Kontra Violénsia Doméstika.

Arguidu konfesa ba tribunál katak akuzasaun loos hotu no lezada deklara katak faktu sira ne'e loos.

Kazu ne'e rejista iha Tribunál Distritál Díli Númeru Prosesu: 630/2012/TDD. Juis Dr. Jose Maria de Araújo prezide julgamentu ne'e, Dra. Ivonia Maria Guterres reprezenta Ministériu Públiku no arguidu hetan defeza husi Dra. Laura Valente Lay husi Eskritóriu Defensór Públiku. Ofisiál Justisa ne'ebé toma konta ba prosesu ne'e mak Sr. Julio da Cruz.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl